



# **Toqusimasup pigisaanik suliaqartarneq pillugu paasissutissat**

Eqqartuussisoqarfiup misiginneqatigaatit qaniginerpaasavit ilaannik annaasaqarsimagavit.

Takorloorparput quppersagaaraq una iluaqutigalugu paasisaqarfiginerussagit toqusoqarnerup kingorna qanoq pisoqassasoq eqqartuussiveqarfimmullu tunngatillugu suliaassat suut suliarineqassasut.



# Eqqartuussisoqarfiup suliamik suliaqarnera

- Eqqartuussisoqarfik toqusoqarneq pillugu palasimiit nalunaarfigineqartarpoq.
- Toqusoqartillugu toqusup pigisaasa agguanneqarnissaat eqqartuussisoqarfiup isumagisarpaa.
- Eqqartuussisoqarfiup pisortat assigiinngitsut allallu, ilanngullugit kommune, Nukissiorfiit aningaaserivillu, allaffigisarpai paasiniallugu toqusimasoq aningaasanik pisassaqaarnersoq. Eqqartuussisoqarfiup paasiniartarpaa toqusimasoq illerfissarsiniaqatigiinnut ilaasortaanersoq aamma kingornussassialiorsimanersoq.
- Eqqartuussisoqarfiup toqusimasup ilaqutai attaveqarfigisarpai paasiniallugu toqusimasoq sunik pigisaqaarnersoq aamma toqusimasup kikkut ilaqutarinerai. Aamma qimagaasut namminneerlutik eqqartuussisoqarfimmut attaveqarsinnaapput.
- Toqusimasup ilaqutaasa toqusimasup pigisai nalillit allatullu aningaasatigut atugai pillugit immersuiffissaq immersortarpaat, eqqartuussisoqarfimmut tunniunneqartussa. Immersuiffissaq nammineq takusinnaavat uani [www.eqqartuussivik.gl](http://www.eqqartuussivik.gl) "Nammineerutissat" → "Immersuiffissat" imaluunniit eqqartuussisoqarfimmut aasinnaavat.
- Eqqartuussisoqarfiup ilaqutaasut oqaloqatigereeraangagit eqqartuussisup isummerfigikkajuttarpaa pigisat suliarineqarnerat qanoq naammassineqassanersoq. Suliaq paasissutissanik allanik piniangikkaluarluni naammassineqarsinnaappat tamatumingga ilisimatinneqassaati. Paasineqarpat suliaq naammassineqarsinnaanngitsoq, eqqartuussisoqarfimmi eqqartuussinissamut aggersarneqarumaarputit. Eqqartuussisoqarfik suliap qanoq suliarineqarnissaa pillugu siusinnerpaamik oqaaseqarsinnaavoq ullormiit toqffiusumiit qaammatit marluk miss. qaangiunnerini.
- Kingornussisussat pigisat qanoq agguanneqarnissaat isumaqatigiissutigippassuk eqqartuussisoqarfiup pigisat kingornussisussanut nammineerussamik agguassassanngortillugit tunniussinnaavai. Nammineerussamik agguassinerup kinguneranik kingornussisussat toqusimasup akiitsuinik akiliinissartik akisussaaffigilissavaat. Kingornussisussat attaveqaataasussamik ilaatigut toqqaassapput, taassuma eqqartuussisoqarfik peqatigalugu suliap suliarineqarnera isumagissavaa.  
Taamaattoqassappat kingornussisussat sinneri pisinnaatitsissummik atsiugaqassapput. Kingornussisussat ilaat nammineersinnaatitaanngippat pigisat nammineerullugit agguanneqarsinnaanngillat.

- Tamatumunnga taarsiullugu eqqartuussisoqarfiup pigisat pisortatigoortumik agguaassinnaavai. Pisortatigoortumik agguaassinermi eqqartuussisoqarfiup suliamik suliaqarneq isumagissavaa, aamma akiligassaqarfigineqartunut pigisat aningaasaataat atorlugit akiliinissaq isumagissavaat, aningaasallu sinneruttut kingornussisussat akornanni kingornussisarnermik inatsisip maleruagassartai malillugit agguaallugit. Pisortatigoortumik agguaassineq nammineerussilluni agguaassinermiit sivisunerusarpoq, tassami eqqartuussisoqarfik toqusimasup akiitsui pillugit paasissutissanik (aggeqqusissuteqarnikkut) piniartussaavoq immaqalu toqusimasup pigisaanik nalilinnik tuniniaalluni.

- Toqusimasup ilaqutaasa immersuiffissaq immersussavaat, taanna takusinnaavat uani [www.eqqartuussivik.gl](http://www.eqqartuussivik.gl)
- Toqusimasup pigisai paarilluakkit
- Toqusimasoq aningaasaateqarpat taakku pigisanut kontomut ikineqassapput
- Toqusimasup kontoaniit tiguseqqusaanngilatit

## **Inatsisitigut pissutsit pillugit qimataasunut ilaqquttanullu siunnersuutit:**

- Toqusimasup pigisai illualu paarilluakkit.
- Toqusimasoq uumasuuteqarpat taakku paarineqarnissaat isumagiuk.
- Toqusimasup tigutsisaa, kontokortia imaluunniit illumut, biilnut angallammulluunniit matuarsaataa eqqartuussisoqarfimmut ingerlaannaq tunniunneqassaaq.
- Toqusimasoq aningaasanik tigummiqarsimappat taakkugu pigisanut kontomut ikineqassapput. Ikisinermut uppernarsaat aningaaserivimmut kortimut ilanngullugu eqqartuussisoqarfimmut nassiunneqassaaq. Pigisanut kontomik suli ammaasoqarsimangippat eqqartuussisoqarfik attaveqarfigissavat.
- Toqusimasup aningaaserivimmi kontoaniittunik tiguseqqusaanngilatit!
- Suliaq naammassineqareertinnagu toqusimasup akiligasaanik akileeqinak, aatsaat akiliigit toqusimasup pisataasa paarilluarnissaannut tamanna pisariaqarluinnarpat.
- Immaqqa pigisat aningaasatigut nalillit – tunineqarsinnaasut - allatorsinnaavatit.
- Apeqqutissaqaruit eqqartuussisoqarfik attaveqarfigiuk.

## Eqqartuussiveqarfik:

- Najugaqarfinni eqqartuussisoqarfiup attaveqarfigineqarnissaa pillugu paasissutissat uani pissarsiarisinnaavatit [www.eqqartuussivik.gl](http://www.eqqartuussivik.gl) imaluunniit 36 38 00 sianerfigalugu.

## Inatsisitigut ikiorsiisarneq:

- Inatsisitigut apeqqutissaqassaguit IKIU inatsisitugut ikiorsiisarfivoq ilinnik akeqanngitsumik siunnersuisinnaasoq. Oqa. 32 45 48/ [www.ikiu.gl](http://www.ikiu.gl).
- Inatsisitigut ajornakusoortumik inissisimaffeqaruit imaluunniit inatsisitigut apeqqutissaqaruit advokatimut inatsisitigut nalinginnaasumik annertusisamiilluunniit siunnersorteqqusinnaavutit. Advokatit inatsisitigut ikiuisartut allattorsimaffiat uani takusinnaavat [www.eqqartuussivik.gl](http://www.eqqartuussivik.gl): "Kalaallit Nunaat" → "Imaaliussaait" → "Inatsisitigut siunnersorneqarneq" → "Eqqartuussissuserisut inatsisitigut ikiuisartut".

